

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN SU KEONG SIONG [KAMPAR]

TARIKH : 21 OKTOBER 2019 (ISNIN)

SOALAN NO. 9

Tuan Su Keong Siong [Kampar] minta **MENTERI PEMBANGUNAN WANITA, KELUARGA DAN MASYARAKAT** menyatakan statistik ibu tunggal muda yang berdaftar dengan Kementerian. Nyatakan skim-skim yang diwujudkan khususnya bagi membantu ibu tunggal muda ini oleh kerana permohonan mereka untuk bantuan sara hidup daripada Kementerian sering kali ditolak atas alasan faktor umur muda.

JAWAPAN

Tuan Yang di-Pertua,

Kementerian melalui Jabatan Pembangunan Wanita (JPW) telah merekodkan pendaftaran ibu tunggal dalam Sistem iWanita secara sukarela bagi yang berminat untuk mengikuti program-program di bawah Jabatan ini. Statistik ibu tunggal dalam sistem iWanita dari tahun 2012 hingga 2018 adalah seramai 78,940 orang. Daripada jumlah tersebut, seramai 44,169 orang adalah ibu tunggal muda yang berumur antara 15 hingga 35 tahun. Walau bagaimanapun, statistik tersebut tidak menggambarkan keseluruhan jumlah ibu tunggal di Malaysia dan jumlah tersebut hanya berdasarkan rekod penyertaan mereka ke program-program yang dijalankan di bawah JPW.

JPW telah melaksanakan Program Pusat Aktiviti Cakna Bangun Ekonomi (PACBE) yang merupakan satu program yang disusun semula dengan

memberi fokus kepada Pembangunan Kapasiti dan Peningkatan Kesejahteraan Wanita. Melalui penyusunan semula fokus, adalah diharapkan ia dapat memberi impak yang lebih bermakna kepada wanita termasuklah ibu tunggal tanpa mengira kategori umur terutama dalam menambah pendapatan. Pelaksanaan Program PACBE dibahagikan kepada tiga (3) bidang utama iaitu:

- i. Bidang ***Community-Based Enterprise (CBE)*** untuk aspek peningkatan kemahiran;
- ii. Bidang ***Psiko-pendidikan (substantif)*** untuk aspek pembangunan pendidikan sosial; dan
- iii. Bidang ***Pengupayaan (empowerment)*** untuk aspek pembangunan keupayaan.

PACBE ini dilaksanakan oleh Pejabat Pembangunan Wanita Negeri (PPWN) di seluruh negara dengan melibatkan penyertaan wanita dan sekurang-kurangnya 30% ibu tunggal. Pada tahun 2018, sebanyak 648 PACBE telah dilaksanakan dengan penglibatan seramai 10,201 orang peserta. Sehingga 30 September 2019, sebanyak 521 PACBE dilaksanakan melibatkan seramai 9,131 orang peserta yang turut merangkumi ibu tunggal muda.

Selain daripada itu, Lembaga Penduduk dan Pembangunan Keluarga Negara (LPPKN) turut melaksanakan program MamaCare, iaitu perkhidmatan penjagaan selepas bersalin yang selamat secara tradisional dan moden termasuk ilmu keibubapaan, bertujuan membantu wanita warga emas, ibu tunggal dan wanita yang layak dari golongan isi rumah berpendapatan rendah (B40) menambah pendapatan keluarga melalui latihan kapasiti MamaCare. Pada tahun 2018, seramai 20 orang peserta yang terlibat manakala sehingga 30 September 2019, seramai 140 peserta yang turut merangkumi ibu tunggal muda telah terlibat dalam program ini.

Di samping itu, Kementerian melalui Jabatan Kebajikan Masyarakat (JKM) juga telah menyediakan bantuan kewangan kebajikan seperti Skim Bantuan Kanak-kanak, iaitu dengan kadar RM100 hingga maksimum RM450 sebulan yang dipertimbangkan kepada keluarga miskin atau ibu /

bapa tunggal yang menjaga anak-anak mereka. Skim ini membantu meringankan beban keluarga miskin atau ibu bapa tunggal buat sementara waktu sehingga kumpulan sasar ini mampu untuk keluar daripada kepompong kemiskinan dan mampu ke arah hidup berdikari.

Kementerian juga telah memperkenalkan Program Caruman Sukarela Insentif Suri atau i-Suri khas untuk golongan wanita termasuk ibu tunggal bagi membantu meningkatkan simpanan suri rumah di hari tua. Sehingga 15 September 2019, seramai 98,619 peserta telah memperoleh manfaat daripada program bantuan bersasar ini, iaitu mendapat insentif khas berjumlah RM40 sebulan atau RM480 setahun.